



**Utschels da prada a Sevgein**

En il foyer da la balla plurivalenta a Sevgein ha lieu actualmain in'expoziun d'utschels da prada.

5



**Giubileum da 225 onns Institut Otalpin a Ftan**

L'Institut Otalpin a Ftan è la pli veglia scola media privata dal Grischun. Motiv da far festa.

11



# LA QUOTIDIANA

Redacziun: Via Sommerau 32, 7007 Cuira, tel. 081 255 57 10, redacziun@laquotidiana.ch



Gion A. Caminada (a san.), l'architect da la «Casa Capaul», cun il cuschnunz Andreas Caminada. FOTO G. N. STIGER

## Dus «stars» – in num

■ (anr/gns) Oz è a Farschno l'avertura da la «Casa Caminada». Suentar ina planisaziun da bunamain sis onns han il star-cuschnunz *Andreas Caminada* ed il star-architect *Gion A. Caminada* realisà la chasa cun hotel, restaurant, butia e furnaria. Cuzunt il restaurant duai esser in'aggiunta tar il restaurant «Schauenstein», il local

da luxus cun ina cuschna excelenta. Ed undrà cun puncts, stails e chapitschas. Or da duas stallas uriundas è daventada la «Casa Capaul», in bajet simpel, da grond caracter e cuzunt er intern cun in chaud empnaivel. Quai è il resultat da dus «stars» cun in num.

> PAGINA 2



Igl onn proxim dispoza la Cuort Ligia Grischa d'in niev curtgin. Las davossas duas jamnas han emprendists da miradur sanau il mir da crappa naturala circumdunt. FOTO S. ROTHMUND

## Fatg mir sco pli baul

■ (anr/sr) Il dumber d'emprendists da miradur en Surselva ei cun actualmeins 22 emprendists legrivels. Quei ha igl impressari *Daniel Blumental* fatg da saver la gievgia a caschun d'ina informaziun dils representants dils mieds da massa a Trun. Leu saneschan actualmeins sis emprendists il mir da crappa naturala che circumdescha la Cuort Ligia

Grischa, in mir ch'ei vegnius construius avon varga 400 onns e fermaus cun caltschina. Per *Anselm Collenberg*, il menader dil coors, ed ils emprendists eis ei ina sfida da sanar il mir aschia che lur lavur semeglia aschi fetsg sco pusseivel quella dils mistergners d'antruras.

> PAGINA 6

## Negina candidatura dil Sursilvan

Il cusseglier nazional Martin Candinas candidescha buca pil post dalla ped el cussegl federal

DA HANS HUONDER / ANR

■ Beingleiti suenter la demisiun da *Doris Leuthard* ei era il num da cusseglier nazional *Martin Candinas* circulaus sco successur pusseivel dalla cussegliera federala ch'ha demisiunau. Pil Sursilvan vegn ina candidatura denton buc en damonda. «Jeu sundel fetg bugen cusseglier nazional e mia finamira ei da vegnir reeligiun l'auter onn en quella funcziun», ha *Martin Candinas* (38) detg sin la damonda dall'Agentura da novitads rumantscha schebein el hagi priu ina decisiun en connex cun la vacanza vegnenta el cussegl federal. Per quella decisiun detri ei differents motivs pesonts: «D'ina vart ei quei segiramein la famiglia, da l'autra vart il pensum da lavur ch'jeu hai-el gia.» Candinas ei bab da treis afons ella vegliadetgna da treis, tschun ed otg onns. Sper la funcziun politica sco cusseglier nazional eis el engaschus en in pensum parzial tier la Helsana, mo lu era ella funcziun da president tier il Surveysch d'informaziun dil traffic public (Litra) e tier l'Associaziun dils surprindiders da helicopter svizra. Medemamein eis el vice-



«Jeu sundel cun plascher ed anim cusseglier nazional. Ina candidatura pil cussegl federal ei per mei negin tema», di *Martin Candinas* da Rabius. MAD

president dall'Associaziun svizra per las regiuns da muntogna (SAB). El ei denton era engaschus en in tschuppel autras funcziuns sco per exempel il presidi dalla Pro Lucmagn. «Quellas

funcziuns pretendan da mei in grond engaschi ed jeu hai-el plascher da quella lavur», di Candinas. Ch'el hagi buca comunicau ladinamein sia decisiun suenter la demisiun da Leuthard argumen-

tescha el sundontamein: «Igl empreh ha il presidi dalla ped svizra vuliu honorar la lavur da *Doris Leuthard* avon che metter numns en circulaziun.» Candinas ei cusseglier nazional dapi siat onns.

## Center Stenna ei prest finius

■ (anr/abc) Aunc rondun 60 gis han ils mistergners peda da finir las lavurs el Center Stenna a Flem. Ier ha igl empreh fittader bardigliu en quel. Suentar la casa Sinergia per l'administraziun cantunala a Cuera seigi quei il grond baghetg dil Grischun, aud'ins da vart nunufficiala. Cun ina surfatscha da 60 162 quadrats ed investiziuns da 167 milliuns francs eis ei in veritabel monster, cun massa localitads, portas, zulers, scalas ed ascensurs. Ina viseta el baghetg ei stada pusseivla ier damai ch'igl empreh fittader ha bardigliu el liug niev. La pratica Stenna ei s'aviarta ella secunda alzada. Igl areal entorn la pratica medicinala ei aunc in plazza da baghegiar. Actualmeins han ils electricists la gronda lavur. Ella tierza alzada vegn il niev hotel «The Hide» ad arver silla stagium d'unviern 2018/19. Sco quei che *Stephan Wegelin*, igl incaricau per las medias dall'interpresa Adven-dis, conferma ei igl interess d'affittar ina surfatscha el Center Stenna gronds. Sco Wegelin conferma ein las 140 habitaziuns el las treis casas dasperas fetg tscher-cadas.

> PAGINA 3

## Individualità illa destinaziun

Strategia turistica in Engiadina Bassa e Val Müstair

DA FLURIN ANDRY / ANR

■ Daspò l'on 2011 fuorman las trais subregiuns Engiadina Bassa, Samignun e Val Müstair ina destinaziun turistica cumünauva. Eir cun render attent a las sportas individualas vegnan tratas a nüz las sinergias. Per cha las organizaziuns turisticas grischunas dvaintan pli efficiantias

vaiva il chantun Grischun inizià il principi dals ons 2000 il proget Destinaziunmanagement-Organisation. Collavorond dessan gnir tratas a nüz las sinergias. Da l'on 2011 es gnüda fundada la DMO Engiadina Scuol Samignun Val Müstair. «No profitain bainshi da las sinergias», disch *Martina Sadler*, la directura da quista DMO, «no lain però al medem mumaint

eir intensivar l'individualità da quistas subregiuns, mettond il focus sillas differentas sportas individualas dals partenaris.» Ella illustrescha quai cun ün exaimpel: «In Samignun sta d'inviern il sport alpin il center, in Engiadina Bassa ed in Val Müstair però eir il passlung, las gianellas e'l far il bogno.

> PAGINA 11



Il focus es d'inviern in Samignun impustüt sün sias sportas per sport alpin. MAD



Servetsch d'abunents e da distribuziun: tel. 0844 226 226 mail: abo@sonmedia.ch